

摘藻堂四庫全書薈要

集部

欽定四庫全書薈要

集部

御選宋詩卷六十三

四

詳校官原任主事

臣

李斯咏



欽定四庫全書薈要卷一萬八千三百七十

集部

御選宋詩卷六十三

五言絕句三

王十朋

九日寄昌齡弟

此日黃花酒深期酌弟兄誰知有離別西望不勝情
白石登山客新詩句必豪寧容杜陵老獨步玉山高
千葉紅桃

在處飄紅雨臨窗照夕陽何時清禁裏一笑伴仙郎

蓼花

秋色在何許蓼花含淺紅客情禁不得歸興逐西風

燕竹

問訊東牆竹佳名今始知龍孫初迸日燕子却來時

西湖柳

瀟灑西湖種誰移向浙東青枝太纖細莫近楚王宮

葡萄

珠帳臨簷挂龍鬚滿架抽也知堪釀酒不要博涼州

芭蕉

草木一般雨芭蕉聲獨多主人栽未足其奈客愁何

石菖蒲

天上玉衡散結根泉石間要須生九節長為駐紅顏

鷓鴣

文采真為累飛鳴不自由小池新水漲相對漫沉浮

題佛閣

桑下不三宿閣中經半年青山滿庭戶雖好莫留連
靈運本狂士偶來蓮社遊鐘魚聽已厭歸去故園休
率飲亭

老去識交情興來懷酒伴山林車馬稀風月壺觴滿
文舉客滿座淵明酒盈尊雖無古高躅妙意亦長存
十月望日買菊一枝頗佳

秋去菊方好天寒花自香深懷傲霜意那肯媚重陽
菊晚不害好固宜登我堂書生自頭白奚用泣馨香

東籬

我豈規彭澤茲籬偶在東悠然見山處仍向菊花叢

四望亭

有澤宜觀水無簷不見山鄱君千里國俯仰一亭間

百花樓

昔日風流守公餘種百花春風不檢點紅紫落誰家

鄱江樓

郭外山橫閣江邊水照樓麴官無暇日何以得消憂

柑

白帝誰云陋黃柑亦自香一枝三百顆風味自吾鄉

馬當山

此地水如峽有山名馬當猶疑是灩澦更合戒舟航

宿富春舟中

苦雨冷朱夏小舟眠富春餘生今可樂歸作太平人

小瀑布

釣瀨雲山外巖花瀑布邊却疑方處士詩思湧如泉

宿飯溪驛

甌嶼飽曾見飯溪名始聞老懷如子美到處不忘君

鷹爪花

誰把名鷹爪天然狀不殊無心事搏擊中有鳥相呼

燭花

郡舍擁爐坐燭開連夜花主人無喜事應是報還家

用滿城風雨近重陽句作七絕

錄五首

重陽無數日風雨登臨緩會見天氣佳黃花插須滿

老對黃花節遙臨白帝城空齋聽蕭瑟點點是鄉情
江山悲木落身世歎飄蓬未曾登山客先吹墮帽風
巫峽有雄風菊天多細雨知我欲登高先期洗塵土
竹葉悲杜陵秋雲近柳惲家鄉鴈蕩遙節物龍山近

劉燭

皇帝閣春帖子詞

新歲朝元使龍荒萬里來至仁天廣大朔漠亦春臺
雉扇開金殿雲韶奏紫庭天顏知有喜班首是前星

觀梅

三杯暖寒酒一榻竹亭煙為愛梅花月終宵不肯眠

陳造

次張學錄韻

廣文無酒錢到官倏改火清談坐蕭齋惟子屢過我
君才高一時從我計亦左要追莊惠塵揮麈論然可

泊上虞驛

溪山可圖畫風物憶吾鄉漁艇鷗鷺亂茅茨菱芡香

龍公底戲劇長笑暝江天雨鵲翻仍語風舟舞不前

姜特立

偶成

鹽面知新瘦看書覺近昏風霜不相貸老意與誰論

臘中感春

小雨濕紅蕤輕颺動碧池東君送消息預作探春詩

野步

江山客思滿雲水稻田空日塢懸秋實霜林墜晚紅

公館

公館當清夜移尊近北墉
秋聲連蟋蟀月色澹芙蓉
雪後雙溪城外

雪消閒出郭騎馬踏山橋
池響水漸落泥融雁齒消
夜飲

風高霜挾月酒暖夜生春
一曲清歌罷華胥有醉人
野坐

野坐花飛片溪行水漲痕
山中閒日月世上別乾坤

晚晴

草木肥梅雨江山快晚晴
芳塘荷芰發香泛葛衣輕

贈湯仲輝郊居

木橋橫野水竹逕踏晴沙
桑苧交陰處中藏隱士家

野步

倚杖立江干丹楓疊嶂寒
何人三昧手畫我看秋山

動植

動植湊東風天機各自濃
花粘蜂股重絮戀柳腰慵

雪晴

六尺弄陰機
新晴閃夕暉
餘寒隨雁去
殘雪帶春歸
古意

共綰同心結
那知有別離
對人爭忍說
不敢畫蛾眉
有感

滴水添壺箭
跳丸疊崦嵫
只誇顏似玉
不覺髻成絲
繭庵回

歸路俯清川
呼奴自刺船
戲魚翻晚照
宿鳥入寒煙

秋園

商氣入山園
園花取次妍
蓼叢迎露重
菊本望秋圓

風色

風色作吳霜
山中草木黃
冷煙籠碧瓦
露葉徧寒塘

山中

不到山中久
山寒景益奇
凍泉零雪谷
墜葉弄風絲

驟寒擁爐

雪霰曉漫漫
天公剩作寒
林梢棲白鳳
爐焰舞紅鸞

村翁

茅茨西日暖翁媪自相依不識鴛鴦意雙雙作伴飛

秋夜月

新月秀彎彎高懸碧落間何當依玉戶瀟灑看江山

小橋

小橋橫野澗物色自孤清終日相晤語松聲與水聲

出郭

歲暮偶出郭斜陽帶遠村雪松含臘意沙水動春痕

春曉

春來貪起早春思
還繚繞一語破春愁
黃鸝韻清曉

秋江柳

春暖和煙重
冬寒帶雪稀
何如秋浦畔
含思獨依依

和虞守感秋

莫憶鱸魚美
吳天浪正浮
只應歸夢到
千頃荻花秋

張良臣

別持上人

茂竹永和寺浣花天寶詩清江入舟楫忍淚別僧時

黃幹

過翠微

古寺殘僧少孤村碧樹圍明朝山下路愁絕望煙歸

詹初

梅

萬木枯歲晚寒梅獨不移幽香對白雪清景月明時

林亦之

續夢中所見兩句

長劒歌明月吳門一夜過紅樓何處是為說馬關坡
記九月二十五夜夢中作

藥圃幽人徑桃源處士居歲時雖屢改蹤跡尚如初

陳藻

霧城山

雲攜山遯出霧逐雨奔來萬象一毫沒孤簷數尺開

壺山四望

天遠碧無地山寒半入空林開生虎穴樹遶梵王宮

題靜江

桂林多洞府疑是館羣仙四野皆平地千峰直上天

舟行

衆流江漸濶百怪石如生錯聽人聲鬧容巖荅漿鳴

樓鑰

水蕉

獵獵水芭蕉如將隱士招清風來處遠溽暑坐中消

裘萬頃

善利閣次伯仁所題趙子良畫

平生交游間吾幘蓋屢岸區區稻粱謀君亦逐鴻雁
風簷手君詩心跡已清絕何當更長吟坐對澄江雪
扁舟兩漁翁清唱發日暮安得如鷗夷相與五湖去

題蘇希亮畫

石梁渡山澗上有秦人居歲寒不種桃汲泉灌佳蔬

劉宰

送李季允侍郎歸蜀用禪房花竹幽為韻

密葉秋逾潤幽花晚更妍
去來誰是主試問白頭禪
地僻風煙好身閒日月長
未知嘉遯吉占驗笑京房
淮海身如繫岷峨路去賒
相思冰雪裏却立嗅梅花
交情契金蘭燕樂非絲竹
我歌古別離語盡君當續
日脚收新雨禪房早得秋
重來應更好誰與共清幽

劉過

遊郭希呂石洞

傾月

去去山轉深樹下益淒冷時有月鳥飛閒碎梧桐影

石井

銀牀遶周遭一規寒侵水試敲拄杖看恐觸蛟龍起

壺天

逆溪隨水行更上紫翠峰朱闌忽飛閣映帶煙霞重

笙鶴

木末俯清軒獨立久閒佇何人騎鶴來髣髴吹笙侶

呂聲之

春郊

勝日遊郊外嵐光入眼新
桃花開萬樹又是一年人

山行

山花雨後紅野草風前綠
浩歌歸去來不辱在知足

周文璞

玉晨觀二首

野筍衝泉出山花避石開
余方有公事不為等閒來

羽扇臨元寺霓衣上醮壇九枝松葉冷千葉杏花殘

高翥

桂

玉蕊琅玕樹天香知易熏露寒清透骨風定遠含芬

葛天民

春懷

向晚一鳩鳴道人春睡足無處寫幽懷巡簷數修竹

趙汝鐸

登樓

地卑梅雨濕氣壓篆煙低孰是披襟處高樓百尺梯

苦吟

幾度燈花落苦吟難便成寒窗明月滿樓上打三更

尋勝

老子移筇杖小童挑酒壺徧尋泉石勝引路倩樵夫

傷春

飛蝶捎風絮鳴禽戀午簷不知春去未但見柳陰添

半夜

坐久香消篆更長
燭屢花一輪觀
浴兔兩部聽鳴蛙

山寺

樹闇常疑夜
山多易得雲
撞鐘最深處
嶺外不曾聞

題莊舍壁

水深荷較晚
地僻草偏多
佇立風前聽
樵夫隔隴歌

後圃

澆花惟要早
芟草不知名
新竹生來巧
南牆補數莖

秋夜

秋到情懷惡美人天一方夜深窗轉月夢斷角吹霜

劉學箕

侵曉書懷

石泉宵冷冷清響雜寒吹恍驚山雨來醒我一覺睡
幽蟲聲唧唧感此秋夜長起坐彈鳴琴蘭釭炫餘光
疎星澹河漢點點在秋水微瀾漾殘輝曲沼通游鯉

題壁

午日柳陰正曉風花氣新川明魚泳水林靜鳥啼春

葉茵

即事

竹暗筍無數江晴水有痕田蛙喧麥隴野犬卧柴門

有所思

仰天有所思心遠目苦短西風驅殘雲千里月華滿

春詠

舍瑟聲不傳詠歸聲在道風乎野水濱夕陽轉芳草

沈說

聽雨

耳根聽不歇
滴滴冷於秋
疑是山翁醉
巖前枕瀑流

戴復古

汀州道上

宇宙何牢落
客行雙髻華
千山萬山底
老眼付梅花

寄興

長願如人意
一生無別離
妾當年少日
花似半開時

嚴羽

閨怨

昨夜中秋月含愁顧景頻空留可憐影不見可憐人

西陵望

西陵終日望不見有歸橈欲去頻回首寒江起暮潮

空齋

寒燈照疎竹棲禽時復驚默坐空齋夜寂寞道心生

嚴粲

松雪

陰崖未知晴松雪自在白可恨晚風顛飛寒亂苔石

七夕

纖巧逐時新誰將大雅陳天孫古機錦笑殺世間人

張輯馮去非話別

此夕真成別幽懷欲語誰梅花霜月曉獨起詠君詩

憶山中

山中桂香滿無復向來遊官事何時了一年孤負秋

即事

僧寺藏深塢漁舟帶遠汀誰教雙白鳥來點暮山青

閏九

前月登高去猶嫌菊未黃秋風不相負特地再重陽

徐經孫

龍門春浪

雷奔石壁間瀑瀉洞門側蜿蜒乘洪濤變化莫可測

隆福晚鐘

山園古寺陰曙隔鯨音發悠揚三四聲喚上東林月

雜興

梅花亦何奇偏得幽人愛清寒風雪夜一枝靜相對

方岳

秋厓

鑿空為此名忽已落衆口聊結一間茅仍當作厓叟

山居十六詠

錄五首

幽谷

入林不厭深避世不厭獨倦飛鳥知還毋憚下喬木

清樾

山林有灌木其大可蔽牛蘄石眠清陰坐閒天地秋

桃李蹊

竹逕轉西麓山花能白紅要知造物心政在無言中

寒泓

子盍觀於水遇險維其止流行非所知一寒清到底

田園居

秋風新飯香蔬亦美可茹寧知世有人萬錢無下筋

此君室

匪書誰與稽匪竹誰與居以書造竹所俛仰千載餘

利登

沽酒

有錢但沽酒莫買南山田勾引催租人驚散青松煙

郊外

春色到江斷野花涵日嬌鳥穿芳樹語人隔遠山樵

春日

雨過苔猶濕風來戶半開
閑花忽落盡啼鳥自飛來

周弼

春怨

極浦蘋花白空壕蘭萼紅
傷心城上燕飛入館娃宮

送客

欲知行遠近細數杜鵑聲
暗入蒼山去千聞是一程

錢時

歲寒即事

鳥語春通信蜂喧日釀和不消花滿院竹外一枝多

安素午睡

禾黍秋相近溪山日自長午窗千嶂雨幽夢一簾香

劉克莊

宿山中

就泉為碓屋壘石作書龕有意耕汾曲無心起水南
玉筋篆文古銀鉤楷法精得知千載下時有打碑聲

答婦兄林公遇

霜下石橋滑蛩吟茅店清夢回殘月影錯認是天明
恨余行李速愧子酒杯長日暮於誰屋天寒陟彼岡
挹君如玉雪未易得親疎何日深山裏同燈共讀書

移居

鄰曲無還往何由有別情惟應小窗月長記讀書聲

乍歸

兒童娛膝下母子話燈前却憶江湖上家書動隔年

北戍邊城下南遊瘴海頭不知天地內何處可逃愁
絕愛牆陰橘花開滿院香鄰人欺不在稍覺北枝傷
弛擔逢除夕團欒共擁爐把如為客看還得似家無
手種梅無恙蒼苔滿樹身可憐開較早不待遠歸人
格律窮方進功夫老始知儘教人貶駁喚作嶺南詩

即事

香火萬家市煙花二月時居人空巷出去賽海神祠
東廟小兒隊南風大賈舟不知今廣市何似古揚州

陳起

寄彭庵

一片巴江月移輝到庾梅孤山春事早疎影望東回

薄暮

寂寥誰作侶耿耿一寒缸薄暮西風急呼童掩却窗

宋伯仁

山下

山下六七里山前八九家家清到骨只賣水仙花

李曾伯

題宜興庵壁

禪榻一覺睡冬宵五更長窗遞清風入枕邊松栢香
拂石坐小橋臨流俯清泚松聲與禽聲可以醒吾耳
永州曉行

推枕月微明登車纔五更啼破千山暝枝禽三兩聲
飛燕

瞥見誰家燕纔驚社日臨洛花移種否喚起故園心

蘭花

行盡離騷國春深未見蘭容非隱君子甘老蕨薇間

古木

古木列官道春風老幹柯炎涼知幾變來往閱人多

姚勉

桂莊

不求田二頃只種桂為莊秋滿黃金粟飽餐風露香

湖上釣者

荷風湖面曉垂釣柳陰中何日能蓑笠扁舟此興同

王君猷花圃八絕

錄四首

海棠城

家住山水國種花以為城詩將日登陴圍春驅酒兵

若春

靜中見萬物各各有春意收拾入襟懷陽和散天地

臨青橋

通渠入小池循除瀲灩鳴羣魚忽悠然過橋聞屐聲

山扉

一徑綠陰去隱隱
花竹幽主人地行仙
終日杖履遊

朱繼芳

蛩

一蛩何唧唧
吟落兒童心
只在竹籬外
篝燈無處尋

吳歌

雁影江潭底
秋聲浦溆間
吳兒歌一曲
月子幾回彎

草蟲便面

蝶舞蜂歌倦蜻蜓看未休誰知織婦意方夏又思秋

鷗

採魚秋江上鷗鳥來相隨蕩槳忽驚起雲天碧四垂

羅與之

商歌

門前桑柘枝中有千錦機遊人不迴顧桃李欲成蹊

林尚仁

暑夜

松風生晚涼坐久市聲歇客去獨行吟踏石碎明月

俞桂

江上

江頭雲閣雨柳色與春深船發春風阻誰知客子心

薛嵎

蓑衣步

水浸石根冷風吹藤葉飛菰蒲秋影裏長趁釣船歸

黃大受

竹

虛心懷月明勁節挺玉立豈是外春風春風不能入

毛珣

山月

山月共徘徊山泉酌一杯詩成無筆寫畫石記蒼苔

王栢

漁舟晚笛

落日下大野江邊漁事收小舟橫斷岸長笛一聲秋

許尚

白龍洞

在橫雲山頂下通澱山湖
每風雨夜有龍出入洞中

呼吸湖中水山椒寄此身洞門風雨夜電火逐霜鱗

鶴坡

府東七十里此地出
鶴俗云鶴窠者是也

索莫東郊遠仙禽盡此藏夢回明月夜林杪響圓吭

西林

林外初晴後斜陽滿芰荷頻來指靈鷲此去路無多

張堯同

題會景亭十首

錄四首

白蓮池

滄波圖四面豔豔玉開花自可除簾幙清香不用遮

桃花亭

不待東風拆池塘已自春試看源上客猶恐是秦人

芙蓉塘

一發連千丈紅雲出素波秋風吹欲老無奈落花何

月波樓

天濶水湖淨溪平玉鑑寒捲簾看晚色鷗鳥傍闌干

牟巖

溪邊釣船

莫出前溪去隨宜下釣鉤風波若不惡鱸鰕滿船頭

題東季博山園二十首

錄四首

東壑

雲卧不禁冷誤把巖扃觸翻動若木枝紅光被空曲

第一溪

倚闌發長嘯援筆記舊遊想見同來者俱非第二流
釣臺

窮鱗無處避網罟如雲密悠然釣臺畔袖手看落日
雲闕

此處若為闕自來還自去中有無心人不妨相伴住
相如撫琴

不負百年心琴中託意深如何渾忘却猶費白頭吟
真桂芳

吉水夜泊

入夜始維舟黃蘆古渡頭
眠鷗知讓客急過蓼花洲

劉辰翁

戲題

無人知坦腹水影半簾苔
驚謂青蟲墮垂絲忽上來

吳大有

餞陳隨隱歸鄉

客行情最苦草草共清尊
萬山千山路今朝好出門

林同

魏孝子

役於大國陟彼岵兮瞻望母兮狄仁傑登山望雲曰吾親舍其下

念母嗟陟岵思親徒望雲可憐魏孝子不比狄參軍

徐庶

辭先主曰老母見獲方寸亂矣王陵母曰為語陵母以老妾故持二心

不勝方寸亂豈暇二心持忍矣王陵將賢哉徐庶辭

桓冲

小字買德郎母病須羊以解以身質羊後為江州刺史

不辭身作質只為母須羊此日江州牧當年買德郎

王悅

導之子有高名事親色養諸子莫及導見輒有喜色

色養傾餘子高名重一時足為丞相喜豈計外人知

文中子

汾水之曲有先人之敝廬在有田可以具饘粥彈琴著書不願仕也

先人舊所理汾曲有田廬何意求聞達彈琴自著書

木蘭

古樂府云阿爺無大兒木蘭無長兄願為市鞍馬從此替爺征

謹勿悲生女均之有至情縈能贖父罪蘭亦替爺征

文天祥

贈羅雪崖樵青

蕭蕭山下人閉門衣裘單春心動溪谷曉起捫松看

贈周東鄉畫魚

觀君瀟湘圖起我濠上心
短褐波濤舊秋雨菰蒲深
咸淳甲戌第二朔予道楮洲里徐旼方諫自長沙來為別問客幾何曰半年矣臨別為賦

君為湘水燕我作衡陽鴈
鴈去燕方留白雲草迷岸

家鉉翁

寄江南故人

曾向錢塘住聞鵲憶蜀鄉
不知今夕夢到蜀到錢塘

文及翁

山中夜坐

悠悠天地間草木獻奇怪投老一蒲團
山中大自在

林景熙

侍應平坡侍郎郊行口占

春霖卷流芳霽旭浮遠野白首正元人
相期古松下
試耕黃犢健入社白鷗真柳外呼舟去
水風吹葛巾

謝翱

友人自杭回建寄別

同來不同去離別暗銷魂
閩浙若同水扁舟送到門
潮信到嚴瀨水色過衢城
寄潮不寄水潮去有回程

鄭思肖

對菊

受命太極前立身晚秋後
一朝揚清香名動天下口
日月雖云逝山中秋自香
平生抱正色誰怕夜來霜
三徑今非昔多愁老此身
誰知陶靖節只是晉朝人

周密

題溫日觀葡萄

百八牟尼顆，携將萬里遊。
歸來還自笑，何不博涼州。

徐直方

觀水

滄江無盡水，夜夜隨潮去。
若復作潮來，滄江止不住。

王曼之

西窗

西窗枕寒池池邊老松樹渴猿下偷泉見影忽驚去

安如山

下瞿塘

去去如奔馬來來無盡船人心似江水日夜向吳天

王翥

送張判官歸巴州

回首三巴曲平生萬里橋衣冠無賴客花月可憐宵

柯芝

橫江

橫江一片碧携鶴上漁船收綸不成下只把釣竿眠

邵定

山中

白日看雲坐清秋對雨眠眉頭無一事筆下有千年

楊雯

北客

北客相催發一日舉千帆遙憐庾開府歲晚望江南

羅公升

秋懷

空庭下梧葉欲靜聞疎雨幽懷耿無寐鄰客終夜語
次韻槐姪送花

塵欺雙髻少春寄一枝多為報花神道晴天載酒過
送歸使絕句

梁楚連天濶江湖接海浮故人相憶夜風雨定何州
手植東臯松勿遣樵牧經他時化鶴歸要斲千年苓

陳普

溪莊

疇昔何來此青山與白鷗絮飛春不去潮返月頻留

黃希旦

二月春將半

二月春將半農耕細雨中花前輕薄子醉倒笑春風

葛長庚

遠景

岸樹冥茫外人家點畫中斷煙分紫翠殘照抹青紅
示周道士

人行秋色裏詩入畫圖中笑指白雲頂猿啼第一峰
蠟梅

破苔如凝蠟粘珠似滴酥恍疑菩薩面初似粉金塗
寶慈寺

殿古涵煙冷樓空得月多鐘聲巡遠岫塔影卧青波
送郭進之

避暑白雲鄉茶甘齒頰香海城悲暮角煙樹澹斜陽

芙蓉

臨水翫芙蓉一花還兩影上倚夕陽斜下浸秋波冷

月夜書事

月光流如酥天影湛於水饑鶴啄梅花風吹酒波起

護國寺秋吟

雁過天成畫魚驚水作紋簷牙宵吐雨殿脊晚馱雲
酒弄三竿日詩成一枕風寒聲落鴻雁秋意著梧桐

樓影秋江白苔碑卧夕陽水昏沙暮起一一雁南翔
嫩竹容歸鵲寒松捧落暉危紅和露落空翠撲衣飛
竹手擎雲重松肩荷月高煙收天地濶醉目數秋毫
香篆孤煙裊燈龕寸火微夢和明月冷心與白雲飛
星似螢千點雲如鶴一雙孤吟寒不寐落葉打空窗

徐道士水墨屏

鴈側風前字煙凝雨後情不知誰氏子持釣立江城
人遠看來短山遙淡欲無水邊漁舍密天際客帆孤

亂山草斜出危岡竹倒懸人家春樹裏山色夕陽邊
霜月沈青嶂汀鷗卧白沙曉風刪竹葉秋霧補山了

玉豔亭即事

正月梅花盡一溪春雨香燕方尋故壘蜂已葺華房
夙酒縈懷處芳亭拄頰間一鶯黃翠柳雙鷺白青山
黃鳥新聲變青山霽色妍預為寒食地晴放海棠天
犬見行人吠牛尋熟路回煙花迷碧嶂花片點蒼苔
風雨平安日山林富貴天筍芽青露爪蕨蕪紫伸拳

雷怡春小隱送春

天不欲留春東君暗歸去
碧梧枝上看瀟瀟送風雨

仙巖無塵軒

塵尾清虛話銅爐起澹烟
嶺頭猿叫罷月落碧潭圓

山庵曉色

燭影奪明月鐘聲撞曉雲
瓷盤餘栢子傾作一爐焚

雪窗

青壁青燈暗紅爐夜火深
雪花窗外白一片歲寒心

風臺遣心

春色濃於酒梅花瘦似詩長青今歲葉粲白去年枝
鵲報千林曉梅供一枕香曉來春思倦餘夢尚悠揚

簡長

夜感

無眠動歸心寒燈坐將滅長恐浮雲生奪我西窗月

清順

題僧房壁

竹暗不通日泉聲落如雨春風自有期桃李亂深塢

景淳

夜坐

夜色中旬後虛堂坐幾更臨溪猿不叫當檻月初生

蘊常

詠石菖蒲

細水圍棋石纖纖手自移幾年離鴈蕩萬里到天池

法平

登北固樓

不負南徐眼來看北固雲金焦兩山小吳越一江分

惠洪

余在制勘院晝卧念故山經行處用空山無人
水流花開為韻寄山中道友八首

錄四首

掃徑偶停帚幽懷疑佇間暮樵迷向背餘響答空山
數峰橫杳靄空翠疑有無落日誰同看啼猿我欲呼
新晴收雨脚宿霧隔花身睡美不知曉啼禽解喚人

舍南一曲溪春漲半篙水去作落崖聲雪花濺山翠
次韻履道雨霽見月

昨夜中庭樹陰寒葉上稠今宵掃疎影寫出十分秋
雨洗詩魂健梅梢月色新遙知愁絕處對影只三人

斯植

遠山

萬里色蒼然春煙夕照邊舊過南岳寺曾向雨中看

照影

性與兒童異飄蓬二十年照來池上影恰似未生前

昨夜

草堂雲去後人境兩茫茫忽見青松老翻疑昨夜霜

雪鵠

風吹蘆葦鳴殘雪滿橋板不見棹回人愁立汀沙晚

和路字

青山何人家芳草滿樵路猿鶴未歸來殘月照煙樹

宿雲軒

千峰雲未還數樹芭蕉綠風雨暗黃昏何人共幽獨
昭儀王清惠

擣衣詩呈水雲

妾命薄如葉流離萬里行黃塵燕塞外愁坐聽衣聲
秋夜寄水月水雲二昆玉

萬里倦行役秋來瘦幾分因看河北月忽憶海東雲
黃淑

詠竹

勁直忠臣節孤高烈女心四時同一色霜雪不能侵

謝希孟

題芍藥

好是一時豔本無千歲期所以謔相贈載之在聲詩

李清照

貴妃閣

金環半后禮鈎弋比昭陽春生百子帳喜入萬年觴

分得知字韻

學詩三十年緘口不求知誰遣好奇士相逢說項斯

朱淑真

書窗即事

花落春無語春歸鳥自啼多情是蜂蝶飛過粉牆西
一陣挫花雨高低飛落紅榆錢空萬疊買不住春風
西樓納涼

小閣對芙蓉
蠹塵一點無水風涼枕簟雪葛爽肌膚

秋樓晚望

涼吹晚颼颼蘆花兩岸秋夕陽樓上望獨倚淚偷流

長宵

霜月照人悄迢迢夜未闌鴛鴦闌夢展轉珠淚向誰彈

丁渥妻

寄外

淚溼香羅袖臨風不肯乾欲憑西去雁寄與薄情看

崔球妻

寄外

數日相望極須知志氣迷夢魂不怕險飛過大江西

賈蓬萊

詠蝶

薄翅凝香粉新衣染媚黃風流誰得似兩兩宿花房

鮑娘

題杉溪驛

溪驛舊名杉烟光滿翠嵐須知今夜好宿處是江南

溫婉

初冬有寄

萬木凋零苦樓高獨凭闌
繡幃良夜永誰念怯孤寒

崖州女子

詠花扇

團扇畫方新金花照席茵
那緣燈下見更值月中人

女道士李少雲

梅花

素豔明寒雪清香任晚風
可憐渾似我零落此山中

湘江漁父

湘江月夜詩

高枕形骸外空江何限情落葉不成調半夜起秋聲

閩清野人

閩清谷中斫樹詩

偶與水雲會不與雲水同雲散水流去杳然天地空

呂仙

楚州紫極宮詩

宮門閒一入獨凭闌干立終日不逢人朱頂鶴聲急

無名氏

題壁

空餘綠綺琴懶把新聲寫不見臨邛人誰是知音者

御選宋詩卷六十三

欽定四庫全書薈要卷一萬八千三百七十一

集部

御選宋詩卷六十四

七言絕句一

盧多遜

後池對新月應制韻限些子兒

太液池邊看月時
好風吹動萬年枝
誰家玉匣開新鏡
露出清光些子兒

宋白

宮詞一百首

并序 錄
二十六首

宮中詞名家詩集有之皆誇帝室之輝華敘王遊
之壯觀挾彤庭金屋之思道龍舟鳳輦之嬉然而
萬乘天高九重淵邃禁衛嚴肅乘輿至尊亦非臣
子所能知所宜言也至於觀往迹以緣情採新聲
而結意鼓舞昇平之化揄揚嘉瑞之徵於以示箴
規於以續騷雅麗以有則樂而不淫則與夫瑤池
粉黛之詞玉臺閨房之怨不猶愈乎是可以鏘絲

黃炳綳素使陳王三閣狎客包羞漢后六宮美人
傳誦者矣援筆一唱因成百篇今則思繼頌聲述
古則庶幾風諷也大雅君子其將莞然詞曰

千官朝擁五門前一路春風蠟燭煙宮漏乍停班已定
紫雲開處望堯天

萬國車書一太平宮花無數管絃聲近臣入奏新祥瑞
昨夜黃河徹底清

律管飛灰報早春壽陽梅淡落香裯詞人競進新詩入

俊思無過白舍人

十二樓前御柳垂九重城裏百花時
宣州恰進紅絲毯
便遣宮娥舞柘枝

彤庭立仗雪初銷仙樂空懸讌百寮
齊指終南稱萬壽
遠平香案碧苔堦

樓前宣赦掣金鷄大禮新成彩仗歸
萬歲聲高天地喜
慶雲飛上袞龍衣

飛煙縹緲拂樓臺纔捲珠簾雉扇開
春滿天顏兩眉喜

玉關新有捷書來

繡鞍新轡飾玫瑰
隨駕堤邊試馬回
苑蕙香輕沙路溼
玉蹄粘得落花來

後苑秋晴校獵歸
淡妝宮女盡戎衣
數中供奉誰精熟
斜勒驕驄掠草飛

春雪輕輕灑露盤
真珠箔外玉構欄
仙妃未起宮娃小
錯報西樓曉月寒

春宵宮女著春綃
鈴索無風自動搖
晝下珠簾鴝子睡

紅蕉窠下對芭蕉

微雲點月漢宮秋水殿疎螢黑處流鳳管不調慵進曲
却排銀燭夜藏鈎

竹宮春祀望神仙百和香高雜絳煙中夜上元來玉座
五雲隨鳳駕珠輶

天子今朝就食遲延英徵得逸人歸靈臺監裏知嘉瑞
隔月先曾奏少微

御製新成喜雪篇六宮傳寫滿香牋金鑾殿女曾偷和

不敢將呈萬乘前

金堂曲讌夜厭厭
仙樂聲清御酒黏
不用司宮排蠟燭
海人新貢夜明簾

雪梅初謝小桃芳
院院鶯啼報海棠
昨日司花新奉勅
後園差使結丁香

紅箋一幅卷明霞
纖手題詩寄大家
檀口微吟遶廊柱
濛濛春雨濕梨花

水心高殿接蘭塘
纔拂龍鬚一簟涼
瑟瑟枕函雲母帳

冰盤仙果近人香

春封東嶽罷泥金羽衛還宮禁籞深昨日祥風來入律
侍臣朝進五弦琴

萬方琛贄泛雲濤來慶星樞電彩高讌罷樂聲移別殿
對花重換赭紅袍

年來春早過新豐只向宮池祭玉龍一片香雲千里雨
樊川杜曲繡重重

魚龍百戲鬧嘈嘈戲罷珠樓日色高移入芳林排小宴

赤瑛盤裏進櫻桃

寒食宮中也禁煙鬱金堂北畫鞦韆梨花明月皆如雪
時送清香到酒前

玉管金箏入夜調今宵靈匹下青霄穿鍼鬪巧香煙濕
樓閣層層拂虹橋

殿角風琴細韻移燭臺春幸翰林時三更向盡諸宮閉
猶在金鑾夜賦詩

賈黃中

桂林還珠洞

赫赫威聲振百蠻
肯攜筐篚溷溪山
無人為起文淵問
端的珠還薏苡還

徐鉉

奉和武功學士舍人寄贈文懿大師

錄一首

舊國荒涼成黍稷
故交危脆似琉璃
高人獨喜湯師在
手把新文數道碑

又聽霓裳羽衣曲
送陳君

清商一曲遠人行
桃葉津頭月正明
此是開元太平曲
莫教偏作別離聲

陳搏

題名水澗

銀河瀉落翠光冷
一派回環湛晚暉
幾恨却為頑石礙
琉璃滑處玉花飛

呂蒙正

讀書龍門山

八灘風起浪花飛
手把漁竿傍釣磯
自是鉤頭香餌別
此心終待得魚歸

張齊賢

午橋新居

午橋今得晉公廬
水竹煙花興有餘
師亮白頭心已足
四登兩府九尚書

寇準

初夏雨中

綠樹新陰暗井桐
雜英當砌墜疎紅
重門寂寂經初夏
盡日垂簾細雨中

送李生

愛君白髮無羈束
命駕長為千里遊
一夜春江又迴棹
當時風雨滿汀洲

余頃從穰下移涖河陽
洎出中書復領分陝
惟茲二鎮俯接洛都
皆山河襟帶之地也
每凭高極望思以詩
句狀其物景久而方
成四絕句書

於河上亭壁

堤草惹煙連野綠
岸花經雨壓枝紅
年來多病辜春醉
惆悵河橋酒旆風

蟬鳴日午樹陰濃
避暑行吟獨杖筇
却愛野雲無定處
水邊容易聳奇峰

岸閣檣稀浪渺茫
獨凭危檻思何長
蕭蕭遠樹疎林外
一半秋山帶夕陽

暮天寥落凍雲垂
一望危亭欲下遲
臨水數村誰畫得

淺山寒雪未銷時

江上

古岸蕭蕭聞去雁
平蕪杳杳更斜暉
空江極目望不盡
楓葉半紅人未歸

柳

曉帶輕煙間杏花
晚凝深翠拂平沙
長條別有風流處
密映錢塘蘇小家

春書

年長追遊興漸凋
况兼巴峽景蕭蕭
閒齋為謝楊花到
時拂殘書慰寂寥

夏日

離心杳杳思遲遲
深院無人柳自垂
日暮長廊聞燕語
輕寒微雨麥秋時

青州西樓雨中閒望

海上秋添寂寞清
萬家煙樹暝重城
蕭蕭細雨遙天暮
獨向高樓聞笛聲

中書秋日有懷青社舊遊

掖垣秋色生雞樹
忽憶青丘感舊情
曾倚西樓吟暮雨
數峰寒碧遶高城

洛陽道中感懷

文陛初辭咫尺顏
恩深猶綴輔臣班
漢庭舊友凋零盡
獨擁雙旌入武關

遊花巖寺

寺對南山積翠濃
水村鷗鷺下遙空
層樓望盡樊川景

恨不凭闌煙雨中

春晝偶書

白晝偶成芳草夢起來幽意有誰知
風簾不動黃鸝語
坐見庭花日影移

憶洛陽

金谷春來柳自黃
曉煙晴日映宮牆
不堪花下聽歌處
却向長安憶洛陽

新蟬

寂寂宮槐雨乍晴
高枝微帶夕陽明
臨風忽起悲秋思
獨聽新蟬第一聲

秋齋

霽景有誰同
遠望秋懷無奈只
悲歌雲收遠嶠凝
嵐翠雨歇空庭敗
葉多

望都雨夜

孤驛蕭條風雨夜
夜深窓竹動秋聲
離魂無睡難成夢
却遶長廊獨自行

夏日有懷

庭樹陰陰夏景遲
閒房愁對暮簾垂
因思往歲陪天仗
正是瑤池賜宴時

南平驛

心隨流水還鄉國
身向青山上屈盤
遠夢不成秋雨細
西風一夜客亭寒

漢上偶書

謫仙唐室遊茲郡
花下聽歌醉眼迷
今日漢江煙樹盡

更無人唱白銅鞮

春陵聞雁

危欄秋盡偶來凭
霜落秋山爽氣澄
誰道衡陽無雁過
數聲殘日下春陵

秋日

柳衰蟬噪寒煙沒
地迴山遙暮雨收
宛是昔年秋氣味
只添多病與離愁

留題洛北羅漢閣

地高閣迴宜閒望望盡雲山首嬾迴林下野僧應笑我
半年旌旆四曾來

輦下春日

雨餘宮闕麗春陰三月花光照上林誰倚青樓望歸騎
日斜南陌柳煙深

臨海驛夏日

嶺外炎蒸當盛暑雨餘新館覺微涼最憐夏木清陰合
時有鶯聲似故鄉

長安春日

澹澹秦雲薄似羅
灞橋楊柳拂煙波
夕陽樓上山重疊
未抵春愁一倍多

憶樊川

閒想舊遊都似夢
別來秦樹又西東
高秋最憶樊川景
稻穗初黃柿葉紅

張詠

雨夜

四簷風雨滴秋聲
醉起重挑背壁燈
世事不窮身不定
令人閒倚虎溪僧

簾幕蕭蕭竹院深
客懷孤寂伴燈吟
無端一夜空階雨
滴破鄉思萬里心

新市驛別郭同年

驛亭門外叙分攜
酒盡揚鞭淚濕衣
莫訝臨歧再回首
江山重疊故人稀

寄傅逸人

當年失脚下漁磯苦為明朝未得歸
寄語巢由莫相笑此心不是愛輕肥

闕下寄傅逸人

疎疎蘆葦映門牆更有新秋鱸味長
何事輕拋來帝里至今魂夢遶寒塘

送別王祕丞

帝鄉三十年前別江上相逢鬢已衰
清論未窮行計速為君臨水立多時

送魏道士

江上蕭蕭木葉飛
天台狂客杖藜歸
莫嫌俗吏勤相顧
曾是嵩陽舊掩扉

聞鷓鴣

畫中曾見曲中聞
不是傷情即斷魂
北客南來心未穩
數聲相應在前村

鄭文寶

赴闕日過石子鎮

得罪先朝出粉闥五原功業更誰知年深放逐無人識
白雪關頭一望時

王禹偁

閣下暮春

詔書稀少日何長閒枕通中睡一場院吏報來丞相出
紫薇花影上東廊

舍人院竹

封了詞頭遶翠竹此君相伴最多情西垣不宿還堪恨

辜負夜窓風雨聲

省中苦雨

霏霏連晝復連宵紅藥蒼苔也寂寥惟有御溝堤畔柳
拂簷遮檻不勝嬌

初入山聞提壺鳥

時秋暖此鳥忽聞

遷客由來長合醉不煩幽鳥道提壺商州未是無人境
一路山村有酒沽

聽泉

平生詩句多山水
謫宦誰知是勝遊
南下閔鄉三百里
泉聲相送到商州

春居雜興

兩株桃杏夾籬斜
妝點商山副使家
何事春風容不得
和鶯吹折數枝花

雪夜看竹

夢斷閒窓酒半曛
月華薄薄雪紛紛
莫言官散無拘束
一夜披衣見此君

杏花

紅芳紫萼怯春寒
蓓蕾粘枝密作團
記得觀燈鳳樓上
百條銀燭淚闌干

暖映垂楊曲檻邊
一堆紅雪罩輕煙
春來自得風流伴
榆莢休拋買笑錢

桃紅梨白莫爭春
素態妖姿兩未勻
日暮牆頭試回首
不施朱粉是東鄰

長愁風雨暗離披
醉繞吟看得幾時
惟有流鶯偏稱意

夜來偷宿最繁枝

陌上繽紛枝上稀多情猶解撲人衣
雙成灑道迎王母
十里濛濛絳雪飛

別商山

欲辭蒼翠入塵囂把酒看山思寂寥
莫動移文苦相責
解梁聞說近中條

別丹水

曾經爛漫濯吾纓忍別潺湲月夜聲
便入紅塵染詩思

吟魂猶合數年清

后土廟瓊花二首

有序

揚州后土廟有花一株瑩白可愛且其樹大而花繁不知實何木也俗謂之瓊花云因賦詩以狀其態

誰移琪樹下仙鄉二月輕冰八月霜若使壽陽公主在自當羞見落梅妝

春水薄薄壓枝柯分與清香是月娥忽似暑天深澗底

老松擎雪白婆娑

留別揚州池亭

竹遶亭臺柳拂池徘徊終戀郡
齋西斜陽更上漁舟坐
明日紅塵逐馬蹄

錢若水

濟源縣裴公亭

裴相亭成未退身空煩舞袖
與歌塵至今亭下蕭蕭竹
似對秋風怨主人

滕白

題汶川村居

種茶巖接紅霞塢
灌稻泉生白石根
鰭腹老翁眉似雪
海棠花下戲兒孫

郭震

漁者

江柳弄風顰翠黛
山花著雨濕胭脂
却收短棹拈長笛
一葉舟中仰面吹

傅霖

贈張乖崖

忍把浮名賣却閒門前流水對青山
青山不語人無事
門外風光任往還

張維

送臨遜秀才赴舉

鵬去天池鳳翼隨風雲高處約先飛
青袍賜宴出關近
帶取瓊林春色歸

楊億

戊申年七夕

蘭夜沈沈鶴漏移
羽車雲幄有佳期
應將機上回文錦
分作人間乞巧絲

劉筠

戊申年七夕

華寢星陳夜未央
明河奕奕動神光
一年暫得停機杼
不奈秋蛩促織忙

錢惟演

戊申年七夕

烏鵲飛來接斷雲
祇貪清淺渡星津
不知一夜支機石
却屬乘槎上漢人

玉露金河顥氣涼
辛夷車轉桂旗香
姮娥可是多猜忌
不駐瓊輪放夜長

一歲佳期一夕過
羽旗雲蓋涉微波
明朝若寄相思淚
玉枕金莖得最多

青鳥當時下紫雲
綺囊書祕露
桃新莫嫌夜半移牀遠
朱雀窓中別有人

驪阜凌雲對玉鈎
千門高切絳河秋
欲聞天語猶嫌遠
更結三層乞巧樓

薛映

戊申年七夕

月放冰輪傍絳河
相期寶婺夜經過
姮娥不惜宮中桂
乞與天香分外多

碧天如水月如鉤金露盤高玉殿秋青鳥前來報消息
一時西望九天虬

漢殿初呈楚舞時月臺風榭鎮相隨如何牛女佳期夕
又待鑾輿百子池

劉秉

戊申年七夕

斜漢西傾桂魄新停梭今夕渡天津世間縱有支磯石
誰是成都賣卜人

丁謂

荷花

夢散高唐夜正遙
楚天何處不無憀
秋風似會荆王意
露渚煙汀養細腰

王欽若

覺林寺

暫拂塵襟思倍清
竹風山色亂泉聲
安民功淺君恩重
又策羸蹄向古城

王曾

蚤梅

石畔籬根取次栽
小園生意覺先來
雪中勿問和羹事
且向百花頭上開

司馬池

行色

冷於陂水澹於秋
遠陌初窮見渡頭
賴得丹青無畫處
畫成應遣一生愁

石延年

秋夕北樓

秋霽露華清帶水月明天色白連河
夜闌澄景生微動
瑟瑟層飈上下波

穆修

貴侯園

名園雖自屬侯家任客閒遊到日斜
富貴位高無暇出
主人空看折來花

玉津園

君王未到玉津遊
萬樹紅芳相倚愁
金鎖不開春寂寂
落花飛出粉牆頭

潘閨

望華山

高愛三峰插太虛
昂頭吟望倒騎驢
旁人大笑從他笑
終擬全家向上居

魏野

尋逸者不遇

尋真誤入蓬萊島香風不動松花老採芝何處不歸來
白雲滿地無人掃

謝龍圖李待制見寄

煙霄閒似在煙霞惟有龍圖學士家和了御詩垂錦帳
卧聽仙樂出宮花

謝孫舍人題名水亭因有紀贈

紫薇客寫青苔壁不與尋常姓字同多謝溪煙知我意

預先替作碧紗籠

暮秋懷潤師

風清月白樹紅時
無柰重城隔潤師
却羨潺湲階下水
夜深流入白蓮池

同潤師宿三門開化院

白蓮社主碧溪人
同宿山門寺裏雲
四面濤聲秋更怒
並牀猶恐話難聞

書黃池谷王山長屋壁

仲先曾到仲淹家書院穿雲一徑斜
勸酒莫嫌無樂送溪聲鳥語在山花

林逋

孤山隱居書壁

山水未深猿鳥少此生猶擬別移居
直過天竺溪流上獨樹為橋小結廬

池上作

簇簇菰蒲映蓼花水痕天影蘸秋霞
分明似箇屏風上

飛起鷓鴣一道斜

菱塘

含機綠錦翻新葉滿匣青銅瑩古花最愛晚來鷗與鷺
宿煙翹雨便為家

易從師山亭

林表秋山白鳥飛此中幽致亦還稀西村渡口人煙晚
坐見漁舟兩兩歸

秋江寫望

蒼茫沙觜鷺鷥眠
片水無痕浸碧天
最愛蘆花經雨後
一蓬煙火飯漁船

乘公橋作

晚峯橫碧樹梢紅
數榜漁罾水影中
憶得江南曾看著
巨然名畫在屏風

送慈師北遊

鬱鬱蒲茸染水田
渡淮閒寄賈人船
知師一枕清秋夢
多為林間放鶴天

復送慈公還虎丘山

子子歸檣五兩翻
香林禪石抱雲根
單囊憇罷還微笑
却是青山不出門

虎丘林壑多在寺垣之內

即席送江夏茂才

與君未別且酣飲
別後令人空倚樓
一點風帆若為望
海門平濶鷺濤秋

送易從師還金華

吟卷田衣歲向殘
孤舟夜泊大江寒
前巖百本長松色

及早回來帶雪看

送人遊金山

水煙霜樹矗層巒點破江心一簇寒
見說天多剩風月
為予閒上上方看

送大方師歸金陵

渺渺江天白鳥飛
石城秋色送僧歸
長千古寺經行了
為到清涼看翠微

答潘司理

庭柯壓雪已如春乘興山陰亦少人岑寂園林何所對
酒中賢聖藥君臣

自作壽堂因書一絕以誌之

湖上青山對結廬墳前秋色亦蕭疎茂陵他日求遺稿
猶喜曾無封禪書

宋祁

重陽不見菊

蜀地秋高未擬寒翠苞如粒露華乾重陽已過君休恨

留取金英晚節看

過摩訶池

十頃隋家舊鑿池
池平樹盡但迴堤
清塵滿道君知否
半是當年濁水泥

九日食糕

飈館輕寒拂曙袍
糗資花飲鬪分曹
劉郎不敢題糕字
空負詩中一世豪

杜衍

雨中荷花

翠蓋佳人臨水立
檀粉不勻香汗濕
一陣風來碧浪翻
珍珠零落難收拾

晏殊

崇因寺

捲簾山色眼前見
入夜濤聲枕上聞
苔徑雨餘堆落葉
石樓風靜鎖寒雲

雪中

平臺千里渴商林內史憂民望最深衣上六花非所好
畝間盈尺是吾心

詠竿戲題中書壁

百尺竿頭裊裊身脚騰跟倒駭傍人漢陰有叟君知否
抱甕區區亦未貧

夏竦

應廷試

殿上袞衣明日月硯中旗影動龍蛇縱橫禮樂三千字

獨對丹墀日未斜

燕雀

燕雀紛紛出亂麻
漢江西畔使君家
空堂自恨無金彈
任爾啾啾到日斜

出守杭州寄執政二絕

造化平分荷大鈞
腰間新佩玉麒麟
南湖不住栽桃李
擬伴沙禽過十春

海鴈橋邊春水深
略無塵土到花陰
忘機不問人知否

自有沙鷗信此心

青雀

青雀孤飛毛羽單
卑棲豈敢礙鵷鸞
明珠自有千金價
莫為他人作彈丸

章得象

放鉢石

石上曾經轉鉢盂
石邊南北路崎嶇
行人見石空嗟歎
還識西來意也無

呂夷簡

天華寺

賀家湖上天華寺一一軒窓向水開不用閉門防俗客
愛閒能有幾人來

陳堯佐

吳江

平沙渺渺煙蒼蒼菰蒲纔熟楊柳黃扁舟繫岸不忍去
秋風斜日鱸魚香

題湖州碧瀾堂

苔溪清淺雪溪斜
碧玉光寒照萬家
誰向月明中夜聽
洞庭漁唱隔蘆花

題潮州韓木亭

侍郎亭下草離離
春色相逢萬事非
今日江山當日景
多情直擬問斜暉

賈昌朝

曲水園

畫船載酒及芳晨丞相園林潁水濱
虎節麟符拋不得却將清景付閒人

韓琦

登永濟驛樓

遠煙荒草媚斜陽蕭索郵亭一望長
盡日倚欄還獨下綠楊風軟杏花香

過三泉龍門

洞戶呀然透碧溪竹軒茅榭映高低
行人不待桃花發

一到仙局已自迷

時知縣錢丞增葺亭
榭間植天桃故云

落花

一夜殘芳泣露痕
曉來紅雨點蘭蓀
對人終有風流在
幾片斜飛在酒尊

溝泉

遙派分流過近堦
潺潺終日瀉瓊瑰
誰知到此幽閒地
多少餘波潤物來

涼榭池上

病襟思適繞東塘
水符初花吐嫩黃
行困老樗陰下坐
兒童爭喜拾紅娘

范仲淹

送鄞江竇尉

片帆飛去若輕鴻
一霎春潮過浙東
王謝江山久蕭索
予真今為起清風

寄林處士

片心高與月徘徊
豈為千鍾下釣臺
猶笑白雲多事在

等閒為雨出山來

送歐伯起

天與神交忽解攜
一溪風月更同誰
自慙瀟灑如猿鶴
却向周郎怨別離

寄潤州龐籍

北固高樓海氣寒
使君應此凭闌干
春山雨後青無限
借與淮南洗眼看

懷慶朔堂

慶朔堂前花自我，便移官去未曾開。
年年憶著成離恨，只托春風管領來。

和提刑趙學士探梅

蕭條臘後復春前，雪壓霜欺未放妍。
昨日倚闌枝上看，似留芳意入新年。

登表海樓

一帶林巒秀復奇，每來凭檻即開眉。
好山深會詩人意，留得夕陽無限時。

文彥博

元已阻雨

林花脉脉怯朝煙
雨隔蘭亭曲水筵
欲買春花無定價
東風撩亂擲榆錢

秋夕偶作

獨誦潘郎秋興賦
閒吟謝客怨情詩
風搖紅樹啼蜚急
月照綠窓清漏遲

春日湖上偶作

岸幘長吟坐釣磯
花香漠漠柳依依
夕陽湖面光如鑑
風送虛舟自在歸

和登飛橋觀遊艇

為愛高橋月色多
飛觴捉麈對吟哦
輕舠一葉時來往
驚散雙鴛動碧荷

寒食遊壓沙寺雨中席上偶作

魏公前歲朝真地

盛傳道士拜章
見公於天門

寂寞闌干尚有情
莫

道甘棠無異種
至今留得雪香名

魏公命主僧建雪香
亭於藜園詩刻在焉

沙路無泥地側金滿園香雪照瓊林一枝帶雨尊前看
還是去年寒食心

清明後同秦帥端會飲於李氏園池偶作

洛浦林塘春暮時暫同遊賞莫相違風光不要人傳語
一任花前盡醉歸

答吳幾復

君說歸期未有期西風又是鱸膾時何當會集香山伴
同赴松窗竹下棋

王琪

答永叔問月

斑斑細雨寒無定皎皎寒蟾望欲闌
應在浮雲最深處更憑絲竹一催看

余靖

再簡伯恭

十載京華九日期帝家園苑醉金卮
今朝郭外尋僧話坐聽寒泉遶竹籬

五色雀 并序

羅浮有五雀各被方色非時不見若士大夫將遊
是山則先入羣翔寺僧以是為候靖庚辰歲謫官
來遊將至之夕茲雀亦集感之成詠云

五方純色儼衣冠應是山靈寄羽翰多謝相逢殊俗眼
謫官猶作貴人看

和沈太博小圃偶作二首

名園雨後百花繁人倚危樓十二闌園裏芳菲樓上客

一般情緒怕春寒

日烘薄霧開柔陌
風冒遊絲著柳條
語燕啼鶯自撩亂
驚人殘夢是春朝

過青泥嶺

老杜休誇蜀道難
我聞天險不同山
青泥嶺上青雲路
二十年來七往還

李之才

行次鳳州

去年二月洛城游今日尋春到鳳州
欲托雙魚附歸信
嘉陵江水不東流

趙抃

和宿峽石寺下

淮岸浮圖半倚天山僧應已離塵
緣松關暮鎖無人跡
惟放鐘聲入畫船

柳軒

動入和風靜惹煙翠條疎處露池蓮
林中盡是能吟物

春有黃鸝夏有蟬

次韻范貫之龍圖

舍車弭蓋爭尋勝坐石攜泉旋煮茶可惜湖山天下好
十分風景屬僧家

括蒼仁安山

又名烏龍山

泉石淙淙瀉百尋羣峰環翠起春林危顛召雨雲先作
不失蒼生望歲心

張方平

雨中登籌筆驛後懷古亭

山寒雨急曉冥冥更躡蒼崖上驛亭
深秀林巒都不見白雲堆裏亂峰青

杜鵑過興州入青陽峽即多杜鵑當冬月不聞
此鳥聲蜀人云杜鵑飲春水即啼靜夜曉月更
淒切入秋即無聲

蜀道寒輕水木清峽中無復杜鵑聲
歸期正是春風暖任向空山叫月明

魚關在青泥驛西二十里危巒疊嶂曰魚關山
小亭臨嘉陵江江有石闌水從石罅迸流魚不
可過故以為名春夏水大沒石魚行無礙矣

中流石埭隱如礧

音堆五嶽
舞而相追

鼓鬣徜徉此復迴春水漸

深泂泳快為傳尺素錦江來

慧聚寺東亭

野色秋光共沈寥水村籬落晚煙交拄笏回就下山路
行看斜陽隱樹梢

李師中

麥積山

路入青松翠靄間，斜陽倒影下溪灣。
此中猿鶴休相笑，謝傅東歸自有山。

孫復

同范祕閣賦八月十四夜月

銀漢無聲露暗垂，玉蟾初上欲圓時。
清樽素瑟宜先賞，明夜陰晴未可知。

蠟燭

六龍西走入崦嵫
寂寂華堂漏轉時
一寸丹心如見用
便為灰燼亦無辭

石介

蜀道中念親有作

東望庭闈魂欲銷
層層雲棧上宮堯
江聲山色情多少
相伴西來慰寂寥

泥溪驛中作

山驛蕭條酒倦傾嘉陵相背去無情臨流不忍輕相別
吟聽潺湲坐到明

劉幾伯

題睢陽九老圖

制舉省元推二伯龍頭昔日屬宣猷人間盛事并遐算
一席幾盈九百籌

十二老共八百九十二歲

張先

贈妓兇娘

十載芳洲撫白蘋
移舟弄水賞青春
當時自倚青春力
不信東風解誤人

張昇

寄夏英公

弱羽傷弓尚未完
孤飛殊不擬鴛鴦
明珠自有千金價
肯與遊人作彈丸

梅摯

江州琵琶亭

陶令歸來為逸賦樂天謫宦起悲歌有絃應被無絃笑
何況臨絃泣更多

御選宋詩卷六十四

謹案卷六十三第三頁後六行苦雨冷朱夏刊本
吟訛吟據梅溪集改

第二十一頁前五行永州曉行刊本州訛舟今改
卷六十四第十二頁後四行滴破鄉思萬里心刊
本破訛被據乖崖集改

第二十二頁後三行白雲滿地無人掃刊本無訛
萬據草堂集改

第二十六頁前四行茂陵他日求還槁刊本陵訛

林據和靖集改





總校官庶吉士臣侍朝

校對官檢討臣蕭九成

謄錄舉人臣李駟